

共同經課 - 1

創世記四十五章一節~十五節

1 約瑟佇許個倚伊身邊的人的面前慳袂住，就喝講：「眾人著離開我出去！」約瑟將伊本身互兄弟認得的時無一人倚佇伊的面前。2 伊就出聲大哭；埃及人聽見，法老的家亦聽見。3 約瑟給伊的兄弟講：「我是約瑟。我的老父猶佇啲嗎？」伊的兄弟袂會應，因為佇伊的面前攏驚惶。4 約瑟閣給伊的兄弟講：「請行倚來。」in就倚來。伊講：「我是恁的小弟約瑟，就是恁所賣到埃及的。5 今，毋免因為賣我到遮來憂悶來家己怨恨。這是上帝差我代先恁來，因為欲保全生命。6 今佇此所在的飢荒已經二年，猶有五年無通種作，無通收成。7 上帝差我代先恁來，為著欲給恁留剩的種族佇世上，閣欲行伊大的拯救，保全恁的活命。8 按呢看起來，差我到遮的毋是恁，就是上帝。伊閣互我親像法老的父，做伊全家的主，及管理埃及全地。9 恁著趕緊上去我的老父遐，給伊講：『你的子約瑟按呢講：上帝互我做全埃及的主，請落來我遮，毋通延延。10 你及你的子你的孫，及牛群羊群，以及一切所有的，攏通來踮佇歌珊的地，及我相近。11 我欲佇遐奉承你；因為猶有五年的飢荒，免得你及你的家眷，及一切所有的，落薄。』12 何況恁的目睷及我的小弟便雅憫的目睷攏看見我及恁親嘴對恁講話。13 恁也著將我佇埃及一切的榮光及恁所看見的事攏給我的老父講，閣著趕緊將我的老父搬來我遮。」14 對按呢約瑟仆佇伊的小弟便雅憫的額頸啼哭，便雅憫也佇伊的額頸啼哭。15 伊閣及眾兄弟唸嘴，抱in啼哭；後來伊的兄弟就及伊講話。

共同經課 - 2

詩篇一百三十三篇

1 〔上崎仔的詩；大衛所做。〕看啊，兄弟和好相及倚起，是何等的好，何等的安樂！2 這通比並彼個貴氣的油斟佇頭殼頂，流到嘴鬚，就是亞倫的嘴鬚，閣流到伊的衫仔裾；3 也通比並黑門的露水落佇錫安諸個山；因為佇遐耶和華有定著賜福，就是永遠的活命。

共同經課 - 3

羅馬書十一章一節~二 a 節，二十節~三十二節

1 我就講，上帝豈有棄揀伊的百姓啊？斷斷毋是。因為我也是以色列人，出佇亞伯拉罕的後裔，便雅憫的支派。2 上帝未曾棄揀伊所代先知的百姓。20 著！in對毋信才過起來，你對信才倚住；心莫得自高，著驚惶。21 因為上帝若無保惜順性的枝，也欲無保惜你。22 著看上帝的慈悲及嚴謹，款待許個跋倒是嚴謹，若是款待你是上帝的慈悲；總是你著長長惦佇伊的慈悲，若無，也欲給你割起來。23 閣in若毋是長長惦佇毋信，也欲得著接，因為上帝會閣接in。24 因為你若對彼個順性做山橄欖的既然割起來，逆性來接佇好的橄欖，何況許個順性的枝欲接佇本舊的橄欖啊！25 兄弟啊，我毋愛恁毋知此個奧妙（免得恁家己掠做智慧），就是以色列中有的成做硬心，聽候外邦滿滿進入，26 按呢通以色列欲攏得救，照所記載講：欲有救主對郇城出，解除雅各的不虔；27 閣我除去in的罪的時，這就是我及in所立的約。28 照福音，就in為著恁來做仇讎；照揀選，就in為著列祖來得著疼。29 因為上帝的恩賜及召人攏無退悔。30 是親像恁前無順服上帝，若是今對in的無順服，恁得著憐憫。31 按呢in今無順服，通對恁的得著憐憫，互in亦得著憐憫。32 因為上帝已經圍萬人佇無順服的中間，刁持欲憐憫萬人。

共同經課 - 4

馬太福音十五章(十節~二十節)二十一節~二十八節

10 就叫眾人來，給in講：「恁著聽來曉悟。11 毋是對嘴入的會互人污穢，就是對嘴出的此個會互人污穢。」12 彼時學生就近來給伊講：「法利賽人聽見此個話，真毋願，你知嗎？」13 伊應講：「見若栽種的物，毋是我的天父所栽種的，欲拔伊的根。14 出在in！in是睛暝啲導路的；若是睛暝給睛暝的導路，二個啲欲跋落陷坑。」15 彼得應伊講：「此個譬喻請給阮解明。」16 伊就講：「恁亦猶久未曉悟嗎？17 豈袂曉得見若對嘴入的，落佇腹肚，來放佇廁池啊？18 若是對嘴出的，是對心內發出，諸個互人污穢。19 因為對心發出歹念頭、行兇、姦淫、私通、偷提、濫糝干證、謗瀆。20 諸個是互人污穢；若是無洗手來食，袂互人污穢。」21 耶穌對遐出去，退去到推羅、西頓的境界。22 抵當有迦南的婦仁人出in的交界，喉叫講：「主啊！大衛的後裔，憐憫我！我的查某子患著鬼真艱苦。」23 耶穌無應伊一句。伊的學生來，求伊講：「著教伊去，因為伊佇咱的後面啲喉叫。」24 伊就應講：「我奉差無毋是就近以色列家失落的羊若定。」25 婦仁人來拜伊，講：「主啊，幫助我！」26 若是伊講：「提子兒的餅互狗仔是毋合。」27 婦仁人講：「主啊，著；因為連狗仔亦會得食in的主人桌腳磕落的餅幼。」28 對按呢耶穌應講：「婦仁人啊，你的信大啦！照你所愛的，給你做成。」對彼時，伊的查某子已經好。